

Inatsisartut suleriaasianni § 37 naapertorlugu matumuuna Naalakkersuisunut imaattunik apeqquteqaatinik saqqummiussivugut:

Apeqqutit:

- 1. Inuiaqatigiinni umiarsualivinnut pilersaarut nutaaq ukiormanna saqqummertussaq sumut killippa?**
- 2. Inatsisartut suleriaasianni § 37 najoqqutaralugu apeqquteqaammut 2016/90 akissuteqaammi Avannaata Immikkoortuani umiarsualiviit qanoq innerinik nalunaarsuiniarneq naammassineqarpa?**
- 3. Uummannami umiarsualivik aasaq manna 2017-imi nutartserneqarniarpa?**

(Inatsisartuni ilaasortat, Nikolaj Jeremiassen, Jess Svane, Siumut)

Tungavilersuut:

Umiarsualiviit allaffissornikkut ingerlanneqarnerat, aserfallatsaalinerat naliginnarmillu ingerlanneqarnerat Inatsisartut inatsisaat nr. 9 junip 3-aniit 2015 najoqqutaralugu ingerlanneqarput.

Kalaallit Nunaanni umiarsualiviit ilai annertuumik inerisarlugillu nutartertariaqarput tamakkulu ukiuni kingullerni 20-ini - 30-ini pilersimapput.¹ Tamanna aamma Uummannap umiarsualivianut atuuppoq.

Uummannami umiarsualivik nunap immikkoortuata aserfallatsaalineqarnissaannut pilersaarummut ilaatinneqaannavippoq, umiarsualiviullu angallatinik umiarsuarnillu tamalaanik tulaffigineqarsinnaaneranut annertusaavigineqassaaq.²

Jens Immanuelsep, Siumumeersup, § 37 najoqqutaralugu apeqquteqaataa 2016/90 naapertorlugu, Naalakkersuisut akissuteqaataanni takuneqarsinnaavoq, Avannaata Immikkoortua – Nuussuup Qeqertaasaaniit sineriak malikkaanni Kullorsuarmut – 2016-imi umiarsualiviit tulattarfiillu qanoq innerinik nalunaarsuisoqassasoq, taamaasillunilu 2017-imi nutarterinerit aallartissallutik.³

Aningaasaqarnermut Inatsisit 2017 kto: 87.73.12

Umiarsualivinnut tulattarfinnullu aningaasaleeqqinnerup (sanaartornissamik aningaasaliineq) [...].

“Umiarsualiviit ineriartornissaannut pilersaarut tamassa naammassartortoq ilutigalugu umiarsualiveqarfiit tamakkua tulleriissaarinikkut iluarsartuunneqassapput.” (AI2017, q.

¹ Kalaallit Nunaani umiarsualiviit pillugit Pilersaarut 2015 – 2025, q. 31

² Ibid., s. 62

³ § 37 akissut 2016/090

Uummannami umiarsualiviit annertuumik sunniuteqarput tamatumani immamiik inuussutissarsiorneq ingerlanneqarmat, minnerunngitsumillu inuussutissarsiortut allat aamma umiarsualiviit tulattarfiillu atorfissaqartimmassuk, umiarsualiviit tulattarfiillu ima aserfallatsigilersimapput, umiarsuaatileqatigiiffinnut annertuumik akissaajaataalersimapput umiarsualiviit talittarfiillu aserfallassimanerisa pisuussutigisaannik nammineq akissaajaatigisariaqarmassuk.

Kissaatigaarput apeqquteqaaterput kingusinnerpaamik ullut suliffiusut qulit iluani akineqassasoq.